

31 OCT 1996

Ramli-Tilawah

RAMLI AJAK UMAT ISLAM KUAT BEKERJA

IPOH, 31 Okt (Bernama) -- Umat Islam disaran supaya tidak banyak bercakap tetapi lebih banyak bekerja dan bermuafakat ke arah menjadikan umat itu kuat dan berketrampilan.

Menteri Besar Tan Sri Ramli Ngah Talib berkata mereka juga harus berfikiran terbuka, bermaruah lagi disegani serta berpandangan global, mempunyai kepakaran pelbagai disiplin ilmu dan kuat bekerja.

Umat Islam tidak boleh menjadi maju dan kuat hanya dengan melaung-laungkan kebenaran dan keindahan agama itu, katanya.

"Perkara yang penting adalah memastikan segala tuntutan agama perlu ditunjuk dan diterjemahkan dengan jelas dan nyata dalam kehidupan seharian", katanya ketika berucap pada perasmian majlis Tilawah Al-Quran peringkat kebangsaan kali ke-39 di Stadium Perak di sini malam ini.

Perasmian itu dilakukan Perdana Menteri Datuk Seri Dr Mahathir Mohamad.

Seramai 30 peserta daripada setiap negeri dan dua johan menunggu mengambil bahagian dalam majlis tilawah selama lima hari sehingga Isnin ini.

Ramli berkata, umat Islam harus menjadi umat yang paling berani melakukan perubahan, bijak merebut peluang serta bijak membina atau mencipta peluang agar tidak terus terpinggir sebagai pemerhati dalam dunia yang penuh persaingan.

Mengenai tilawah itu, Ramli berkata, umat Islam sewajarnya mengambil peluang untuk merenung dan bermuhasabah bagi menilai sejauh mana mereka telah berusaha untuk mempelajari dan melaksanakan semua tuntutan Al-Quran.

Ramli juga berkata, Kerajaan Perak menjadikan kemajuan agama dan umat Islam sebagai agenda utamanya.

Lebih banyak masjid baru akan dibina terutama di kawasan perindustrian dan taman-taman perumahan baru sebagai tambahan kepada 570 buah masjid dan 2,000 buah surau sekarang.

Beliau berkata, terdapat sejumlah 34 buah sekolah menengah agama dan 561 buah sekolah rendah agama di negeri itu yang menempatkan lebih 100,000 pelajar.

Kerajaan Negeri juga meluluskan peruntukan bagi membina pusat tahfiz dan sebuah sekolah menengah agama berasrama penuh yang akan siap dan beroperasi pada awal tahun 1998, katanya. -- BERNAMA

LAT NMO